

佛說犯戒罪輕重經

漢唐譯並云世高所譯恐非

後漢安息三藏安世高譯

如是我聞一時佛住王舍城迦蘭陀竹園爾時尊者大目犍連晡時從禪定覺往至佛所頭面禮足却坐一面合掌恭敬而白佛言世尊意有所疑今欲請問惟願聽許佛告目連恣汝所問當爲汝說目連即白佛言世尊若比丘比丘尼無慚愧心輕慢佛語犯衆學戒如是犯波羅提提舍尼波逸提偷蘭遮僧伽婆尸沙犯波羅夷得幾不饒益罪惟願解說佛告目連諦聽諦聽今爲汝說若比丘比丘尼無慚愧輕慢佛語犯衆學戒如四天王壽五百歲墮泥犁中於人間數九百千歲復次目連若無慚愧輕慢佛語犯波羅提提舍尼如三十三天壽千歲墮泥犁中於人間數

三億六十千歲復次目連若無慚愧輕慢佛語犯波夜提如餓摩天壽二千歲墮泥犁中於人間數二十四億四十千歲復次目連若無慚愧輕慢佛語犯偷蘭遮如兜率天壽四千歲墮泥犁中於人間數五十億六十千歲復次目連若無慚愧輕慢佛語犯僧伽婆尸沙如不憍樂天壽八千歲墮泥犁中於人間數二百三十億四十千歲復次目連若無慚愧輕慢佛語犯波羅夷如他化自在天壽十六千歲墮泥犁中於人間數九百二十一億六十千歲尊者目連聞佛所說歡喜奉行爾時目連即說偈言

因緣輕慢故 命終墮惡道 因緣修善者 於此生天上 緣斯修善業 離惡得解脫 不善觀因緣 身壞墮惡趣 比丘謹慎樂

放逸多憂譴 變淨小致大 積惡入火焚
持戒福致喜 破戒有懼心 永斷三界漏
爾乃得涅槃 戒德可恃怙 福報常隨心
見法爲人長 永遠三惡道 戒慎除恐懼
福德三界尊 鬼龍邪毒害 不犯持戒人
神仙五通人 造世諸呪術 爲彼慚愧者
斷諸無慚愧 如來制禁戒 半月半月說
已說戒利益 稽首禮諸佛

佛說犯戒罪輕重經